

Qimussertarnej qimussillu piujuartinnissaat qulakkeerniarlugu, Naalakkersuisut ukiuunerani tuttutassanit qimussimik tuttunniartartunut immikkut immikkoortit-seqqullugit peqquneqarnissaannik Inatsisartut aalajangiiffigisassaattut siunnersuut.

(Inatsisartuni ilaasorta q Doris Jakobsen Jensen, Siumut)

Akissuteqaat

(Aalisarnermut Piniarnermullu Naalakkersuisoq)

Siullermeerneqarnera

Siunnersuuteqartoq Doris Jakobsen Jensen, Siumut, ukiuunerani tuttunniarnermut pisassiissutit atuuttut ilaasa tuttunniarnerup qimussimik ingerlanneqartarnissaanut inniminnerneqarnissaat qimussernerup kulturua attatiinnarniarlugu Naalakkersuisut peqqunneqarnissaannik Inatsisartut aalajangiiffigisassaattut siunnersuummut Naalakkersuisunit qutsavigissavarput.

Tuttunniarnermut pisassiissutit piffissaliussallu susasaqartut tamarmik tusarniaaffigereerlugit ukiut tamaasa aalajangiiffigineqartarput, tassungalu atatillugu ilisimatitsissutigisinnaavara tuttunik aqutsineq ukiup qanoq ilinera najoqqutaralugu pitsaanerpaamik atorluanaanissaq siunertaralugu ingerlanneqartarmat. Tamanna pillugu tuttunniarnej aasaanerani aamma ukiaanerani ingerlanneqartarpoq, pissutigalugu tuttut taamaalinerani timikkut pitsaanerpaamik inissisimmamata tuttullu neqaa, tunnua aamma amia ukiup qanoq ilinera najoqqutaralugu pitsaanerpaajuullutik. Tuttut ukiuunerani timikkut ajornerpaamik inissisimasarput akornusersorneqarnermiillu malussarissorujussuullutik. Taassumalu saniatigut kulavaat amerlasuut ilumioqartarlutik. Ukiuuneranilu tuttunniartoqarneratigut akornusersorneqartariaqaratik. Taamaattumik ukiukkut tuttunniarnej piffissatigut pitsaasuunngilaq aqutsinermilu tuttunik pisariaqartumik ikilisaasoqassatillugu aatsaat ingerlanneqartariaqarluni.

Taamaakkaluartorli piniarfeqarpoq ukiuunerani killilimmik tuttunniarfigineqartartunik, tassanilu aasaanerani aamma ukiaanerani pisassat tamakkerneqarsimangikkaangata ukiuuneranut killilimmik tuttunniarnissamut nuunneqartarput pisassat aalajangersarneqareersut sippornagit. Taamaammatt pisassanit sinneruttut pineqarput kulavaallu piniaqqusaanatik.

Naalakkersuisut qimussernerup kulturua attatiinnarneqarnissaa pingaaruteqarluninartutut isigivaat, tamanna aamma Naalakkersuisoqatigiit isumaqatigiisutaannut naapertuuppoq. Isumaqarpugut qimussernerup kulturua, taamaattoqarfinni, assartuutitut motoorilinnut nipitoqisunullu, piniakkanillu qimaatitsisartunut naleqqiullugu nukittorsarneqartariaqartoq. Assartuutitut motoorilinnik atuineq kommunimi ileqqoreqqusat sukkuut ingerlaartoqaqqusaanersoq sukkuullu ingerlaartoqaqqusaannginnersoq pillugu aalajangersakkanik imalinnik killilersimaanerqartarpoq. Tamanna piniarfinni aamma atuuppoq. Taamaattumik qimussimik ingerlaarnissaq iluatinnaateqareerpoq pissutigalugu qimusseqarfinni sumiluunniit ingerlaarfigeqqusaasut ingerlaarfigisinnaammattigit.

Naalakkersuisut tuttoqatigiit killeqarfii aqutsiveqarfiillu najoqqutaralugit aasaanerani, ukiaanerani, ukiuuneranilu piniartoqassappat tuttunniarnissamut pisassiissutitut agguaassisarput. Tuttutassiissutitut nalunaarutigineqartartut piniariaatsit imaluunniit piniutitut najoqqutaralugit agguanneqartannngillat. Ullutsinni qimussimik tuttunniarsinnaaneq akornutissaqanngilaq. Qimusseqqusaaffiusunili piniariaaseq najoqqutaralugu tuttutassiissutitut agguaassisinnaaneq

pillugu Naalackersuisut aalajangersaasinnaanissaannut tunngavissamik inatsisissatut siunnersuummut ilanngunneqarnikuvoq. Kommunit taamaalillutik inatsisip allanngortinneqarneratigut kommunip iluani pisassiissutit aalajangersarneqartut iluanni namminneerlutik assersuutigalugu qimussimik piniarnissamut immikkut pisassiinissamut periarfissaqalissapput.

Tamanna tunngavigalugu Naalackersuisut sinnerlugit innersuussutigissavara siunnersuut akuerineqassasoq.